

- उपराष्ट्रपति जगदीप धनखड़ कह्यो—शिक्षा समाज मांय बदलाव अर बराबरी लावण रो सब ऊं मोटो जरियो।
- जयपुर मांय आज राइजिंग राजस्थान एनर्जी प्री-समिट रा तैत ऊर्जा हलका मांय साढे छह लाख करोड़ रुपया ऊं बत्ती रकम रा करार करी ज्या।
- प्रदेश री पीएम श्री स्कूलां मांय अब प्री-प्राइमरी कक्षावां सरू करी जावेला—दाखिला रो काम काल ऊं सरू व्हेला।
- राज्य मांय पारो और उत्तरयो— माउंटआबू रे अलावा चार-पांच और ठोड़ां तापमान 10 डिग्री सेल्सियस ऊं नीचे उत्तरयो।

000

उपराष्ट्रपति जगदीप धनखड़ कह्यो है के तालीम समाज मांय बदलाव अर बराबरी लावण रो सब ऊं मोटो जरियो है। वे आज झुंझुनूं जिला मांय काजरा रा जवाहर नवोदय विद्यालय रा विद्यार्थियां ने सम्बोधित कर रह्या हा। श्री धनखड़ कह्यो के शिक्षा ऊं जो चरित्र मिले है, वां ऊं इंसान रा व्यक्तित्व री ठा पड़े है। वे अनुशासन, संस्कार अर मानव निर्माण रा महत्त्व माथे जोर दीनो। वे कह्यो के बच्चां ने कम उम्र मांय ई नैतिक संस्कार देवण सागे भाईचारा अर अनुशासन री सीख देवणी चाहिजे। उपराष्ट्रपति कह्यो के देश री आत्मा गांवाई हलकां मांय है अर पंचायती राज अर नगर पालिका सरीखी संस्थावां रे मार्फत लोकतंत्र ने ज़मीनी स्तर ताई मज़बूत बनायी ज्यो है। उपराष्ट्रपति राष्ट्रीय शिक्षा नीति ने "गेम-चेंजर" बताता थकां कह्यो के तीन दशकां पाछे विद्यार्थियां ने कौशलयुक्त बणावण वाळी शिक्षा नीति मिली है। वे विद्यार्थियां ने पर्यावरण रा प्रति जागरूक करता थकां वां रा दादा-दादी अर नाना-नानी रा नाम ऊं पौधा रोपण री अपील कीनी।

000

दिसम्बर मांय व्हेवण वाळी राइजिंग राजस्थान इन्वेस्टमेंट समिट ऊं पैली आज जयपुर मांय राख्यी ज्यी एनर्जी प्री-समिट मांय ऊर्जा हलका रा निवेशकां सागे साढे छह लाख करोड़ रुपया ऊं बत्ती रकम रा करार करी ज्या। मुख्यमंत्री भजनलाल शर्मा री मौजूदगी मांय करी ज्या आं करार रे जरिये सौर, पवन, हरित हाइड्रोजन, हाइब्रिड, पंप स्टोरेज, बैटरी स्टोरेज अर हरित अमोनिया री परियोजनावां समेत अक्षय ऊर्जा अर बिजली बणावण री न्यारी-न्यारी परियोजनावां माथे काम करण रो प्रस्ताव है। ई मौके मुख्यमंत्री कह्यो के आं निवेश प्रस्तावां ऊं राज्य मांय नौकरी-धंधा रा करीब 70 हजार मौका बणेला।

मुख्यमंत्री निवेशकां ऊं प्रदेश ने बिजली रा हलका मांय खुद रे पांण ऊबो करण री अपील कीनी। वे कह्यो के सरकार बेगी ई इंटीग्रेटेड क्लीन एनर्जी पॉलिसी 2024 लावेला।

000

मुख्यमंत्री भजनलाल शर्मा कह्यो है के सरकार प्रदेश ने आवता पांच साल मांय साढे तीन सौ बिलियन डॉलर री माली व्यवस्था बणावणो तैय कीनो है। वे आज जयपुर मांय सिंगापुर रा नुमाइंदा रा एक दल सागे मीटिंग मांय बोल रह्या हा। मुख्यमंत्री कह्यो के प्रदेश मांय स्वास्थ्य, जल संचय अर उद्योग लगावण समेत न्यारा-न्यारा हलकां मांय बेहतरिन काम कर रह्यो है। वे कह्यो के राइजिंग राजस्थान ग्लोबल इन्वेस्टमेंट समिट ऊं पैली व्ह्या न्यारा-न्यारा सम्मेलण मांय हाल ताई 20 लाख करोड़ रुपया रा करार कर्या जा चुक्या है।

000

जयपुर मांय आवता महीना राख्यी जावण वाळी राइजिंग राजस्थान इन्वेस्टमेंट समिट री तैयारियां रो मुख्य सचिव सुधांश पंत आज जायज़ो लीनो। वे अहलकारां सागे आयोजन री ठौड़ दाखिल व्हेवण अर निकासी, खास लोगां री आवण-जावण, गाड़ियां ऊबी करण री ठौड़, यातायात अर हिफाज़ती इंतज़ामात रा बारा मांय जाणकारी लीनी। मुख्य सचिव आयोजन री ठौड़ साफ-सफाई, अस्थायी ढांचा बणावण अर स्टॉल्स रा प्रबंधन समेत भांत-भांत री व्यवस्थावां सारू जरूरी हुकम दीना। ई बीचे शाहपुरा मांय 22 अक्टूबर ने राख्यी ज्यी राइजिंग राजस्थान इन्वेस्टर प्री-समिट मांय करी ज्या करार री जिला कलेक्टर राजेन्द्र सिंह शेखावत आज समीक्षा कीनी अर अहलकारां ने जरूरी हुकम दीना।

000

कृषि मंत्री किरोड़ी लाल मीणा अर गृह राज्य मंत्री जवाहर सिंह बेढम आज टोंक जिला रा समरावता गांव रो दौरा कीनो। वे गांव वाळां सागे मुलाकात कर र सरकार कानी ऊं करी ज्या फ़ैसलां री जाणकारी दीनी। ई

पाछे खबरनवीसां सागे बातचीत करता थकां कृषि मंत्री कह्यो के उपचुनाव री बगत घट्या वाकया रे कारण व्हा नुकसाण रो सर्वे सरु करा दियो ज्यो है।

.....
कृषि मंत्री कह्यो के सरकार पीड़ितां ने मुआवजो देवेला। किरोड़ी लाल मीणा कह्यो के **ग्राम पंचायत** मांय विकास रा न्यारा-न्यारा काम कराया जावेला। कृषि मंत्री बतायो के सरकार समरावता समेत 28 गांवां ने देवली री बजाय उनियारा उपखण्ड मांय शामिल करण परां ई राजी है। इण ऊं पैली डॉ. मीणा टोंक री जेल मांय समरावता मामला रा आरोपितां सागे मुलाकात कीनी।

000

प्रदेश री पीएम श्री स्कूलां मांय प्री-प्राइमरी कक्षावां सरु करी जावेला। प्रारंभिक अर माध्यमिक शिक्षा निदेशालय ई बाबत् हुकम जारी कीना है। ई रा पैला दौर मांय 402 पीएम श्री स्कूलां चुणी ज्यी है। ई सारु काल ऊं दाखिला रो काम सरु कर्यो जावेला। सप्ताह मांय पांच दिन चालण वाळी अ कक्षावां रोजीना चार घंटा लागेला। प्री-प्राइमरी कक्षावां मांय तीन साल या इण ऊं बत्ती उम्र रा बच्चां ने दाखिलो दियो जावेला। हर पीएम श्री स्कूल मांय ई सारु 25 सीटां व्हेला।

000

75वों संविधान दिवस 26 नवम्बर ने प्रदेश मांय ई जळसा सागे मणायो जावेला। युवा मामलात् अर खेल विभाग रा शासन सचिव नीरज के. पवन बतायो के ई मौके जयपुर मांय संविधान क्लब ऊं अंबेडकर सर्किल ताई पैदल यात्रा निकाळी जावेला। ई सागे ई फौज, राजस्थान पुलिस, आरएसी अर गैर-सरकारी स्कूलां रा विद्यार्थियां री ओर ऊं बैंड वादन कर्यो जावेला। पैदल यात्रा रा गेला मांय न्यारी-न्यारी ठौड़ां खुद री फोटो खींचण रा बूथ बणाया जावेला। प्रदेश रा न्यारा-न्यारा जिलां मांय ई ई मौके कार्यक्रम राख्या जावेला।

000

पैली वाळा विधायक गिरिराज सिंह मलिंगा आज धौलपुर जिला री एससी एस टी मामलां री अदालत मांय खुद समर्पण कर दीनो। मलिंगा सुप्रीम कोर्ट ऊं जमानत रद्द करी जावण पाछे अदालत मांय खुद समर्पण कीनो। वां माथे बिजली महकमा रा एक इंजीनियर सागे मारपीट करण रो आरोप है।

000

राज्य महिला आयोग री अध्यक्ष रेहाना रियाज चिश्ती आज सवाईमाधोपुर मांय जनसुणवाई कीनी। ई दौरान वे 35 मामला सुण्या। आं मांय घरेलू हिंसा, मारपीट, बिजली रा बिल, राशन कार्ड ऊं जुड़ी शिकायतां समेत न्यारा-न्यारा मामला शामिल हा। वे अहलकारां ने अ मामला बेगा निपटावण सारु जरूरी कार्रवाई करण रा हुकम दीना।

000

जयपुर अर जयपुर ग्रामीण जिला री जिला स्तर री जनसुणवाई काल जयपुर रा जिला कलेक्ट्रेट मांय संवारे 11 ऊं दोपहरां पाछे 2 बज्यां ताई चालेला। जनसुणवाई रा कार्यक्रम मांय जिला रा जनता रा नुमाइंदा अर जिला स्तर रा अहलकार शिरकत करेला। मुख्य सचिव या प्रभारी सचिव वीडियो कॉन्फ्रेंस रे मार्फत जुड़ेला। जिला रा सगळा उपखंड अधिकारी अर ब्लॉक स्तर रा अहलकार ई वीडियो कॉन्फ्रेंस रे मार्फत शामिल व्हेला। **करौली** रा जिला कलेक्टर नीलाभ सक्सेना धौरेटा ग्राम पंचायत मांय राख्यी ज्यी रात्रि चौपाल मांय जनता री समस्यावां सुणी अर अहलकारां ने जरूरी हुकम दीना।

000

टोंक जिला रा बीसलपुर बंधा री दोन्यू नहरां ऊं आज पाणत सारु पाणी छोड़ी ज्यो। बंधा रा अहलकार आज संवारे पूजा-अर्चना कर र जीमणी अर डावीं ओर ऊं पाणी छोड़्यी ज्यो। बीसलपुर बांध रा अधीक्षण अभियंता वी.एस. सागर बतायो के ई साल चोखो मेह बरसण ऊं बंधो पूरो भर्योड़ो है। ई कारण बंधा री जीमणी अर डावीं नहरां मांय 105 दिन ताई पाणत सारु पाणी छोड़बा रो प्रस्ताव है।

000

सियाळा री सरुआत सागे ई राज्य मांय पारो लगातार उतर रह्यो है। माउंट आबू रे अलावा चार-पांच और ठौड़ां न्यूनतम तापमान दस डिग्री सेल्सियस रा लेवल ऊं नीचे उतर ग्यो। आं मांय शेखावाटी हलका री घणखर ठोड़ां शामिल है। 14 और जगहां पारो 10 ऊं 12 डिग्री सेल्सियस बीचे नापी ज्यो। राजधानी जयपुर मांय ई रात री बगत तापमान और कम व्ह्यो है। दिन री बगत ई पारो 32 डिग्री सेल्सियस ऊं नीचे उतर ग्यो है। घणखर ठोड़ां तापमान सामान्य ऊं नीचे चाल रह्यो है। मौसम विभाग थावर ताई मौसम सूखो रेहवण रा आसार जताया है।

000

भरतपुर मांय आज संभाग स्तर री अमृता हाट सरु व्ही। जिला कलेक्टर डॉ. अमित यादव इण रो उद्घाटन कीनो। वे महिला स्वयं सहायता समूहां कानी ऊं लगायी ज्यो हाथ री कारीगरी ऊं बणायी ज्यो सामान री स्टॉलां देखी अर वां रा बारा मांय जाणकारी लीनी। अमृता हाट मांय प्रदेश रा न्यारा-न्यारा जिलां रा महिला

स्वयं सहायता समूह री महिलावां कानी ऊं बणायी ज्या खिलौना, टेराकोटा, चद्दर, कशीदाकारी रा कपड़ा, हाथ ऊं बण्या न्यारा—न्यारा सामान समेत केई भांत रा सामान री स्टॉल लगायी ज्यी है।

000

सीमा सुरक्षा बल—बी.एस.एफ़ री बाड़मेर सेक्टर मांय तैनात 76वीं बटालियन ने बेहतरीन बटालियन रा खिताब “जनरल चौधरी ट्रॉफी” ऊं नवाजी ज्यी है। “वीर छिहत्तर” रा नाम ऊं पिछाणी जावण वाळी ई वाहिनी रा जवान शारीरिक अर बौद्धिक क्षमता अर संक्रियात्मक उपलब्धियां सरीखा मापदंडां माथे खरा उत्तर र ओ खिताब हासिल कीनो।

000

सरकार संसद रा सिंयाळू सत्र ऊं पैली 24 नवम्बर ने सगळी सियासी पार्टियां री मीटिंग बुलाई है। रक्षा मंत्री राजनाथ सिंह री सदरत मांय राख्यी जावण वाळी ई मीटिंग मांय सरकार सत्र रे दौरान लोकसभा अर राज्यसभा रो कामकाज ठीक ढंग ऊं चलावणो तैय करण सारू सियासी पार्टियां री मदद मांगेला। संसद रो 25 नवम्बर ऊं सरू व्हेवण वाळो सिंयाळू सत्र 20 दिसम्बर तांई चालेला।

000